

Supervizor pozdravlja mjere kojima se određuje obavezan pritvor za počinioce težih krivičnih djela



Supervizor za Brčko dr. Raffi Gregorian pozdravlja način na koji je Skupština Distrikta 10. juna 2009. godine jednoglasno usvojila izmjene Zakona o krivičnom postupku Distrikta kojima se propisuje obavezan pritvor za počinioce težih krivičnih djela koji su u prvostepenom postupku osuđeni na kaznu zatvora. Ove izmjene, koje su objavljene u Službenom glasniku Brčko Distrikta BiH br. 17/09 i koje će uskoro stupiti na snagu, pomažu da se premosti jaz na osnovu kojeg je bilo moguće da počinioci težih krivičnih djela ostanu na slobodi čak i nakon izricanja osuđujuće presude u prvostepenom postupku. Ovo pitanje je na dramatičan način aktuelizovano kada je okorjeli kriminalac, koji je u žalbenom postupku pušten na slobodu, ispalio nekoliko hitaca u policajca Nasveta Čolića. Supervizor je pozvao da se odmah preduzmu mjere kako bi se u budućnosti spriječila takva dešavanja.

Supervizor je izrazio čvrstu podršku Pravosudnoj komisiji Brčko Distrikta i Zakonodavnoj komisiji Skupštine za njihovu inicijativu da izmijene član 138 Zakona o krivičnom postupku Brčko Distrikta. Novom odredbom je propisano da svim pojedincima koji su osuđeni na kaznu zatvora u trajanju od pet i više godina bude određen pritvor, dok se sudovima ostavlja mogućnost da odluče o tome da li će odrediti pritvor za lica koja su osuđena na kaznu zatvora u trajanju od manje od pet godina.

Supervizor je pohvalio poslanike Distrikta zbog toga što su blagovremeno usvojili neophodne odredbe.

«Distrikt je još jednom pokazao da predvodi ostatak BiH u smislu efektivnih i značajnih reformi. Ova jedinstvena izmjena zakona u BiH predstavlja veliki korak ka unapređenju vladavine prava i čini Distrikt bezbjednijim mjestom za sve njegove građane», istakao je supervizor. «Počinioci težih krivičnih djela koji su osuđeni na kaznu zatvora više neće moći da izmiču pravdi ili naude drugima. Pošto ovaj problem postoji širom BiH, nadam se da će entiteti i državni parlamenti razmisliti o tome da usvoje slične odredbe na prostoru na kome imaju nadležnost», zaključio je supervizor.